

06/09/1998

Shahidan nyata sokongan melalui telegram

KANGAR: Menteri Besar Perlis Datuk Seri Shahidan Kassim yang mewakili badan perhubungan Umno negeri, wakil rakyat dan semua peringkat kepimpinan Umno di negeri itu menghantar telegram untuk menyatakan sokongan padu mereka kepada Perdana Menteri, Datuk Seri Dr Mahathir Mohamad.

Mereka menyatakan merestui segala keputusan yang diambil Perdana Menteri mengenai kedudukan Datuk Seri Anwar Ibrahim dalam kerajaan dan parti bagi kepentingan masa depan parti dan negara.

Setiausaha Politik Menteri Besar, Baharudin Ahmad berkata, badan perhubungan negeri, kepimpinan peringkat cawangan, Pergerakan Pemuda dan Wanita Umno di negeri itu sentiasa bersama Perdana Menteri dalam apa juga tindakannya.

Pergerakan Pemuda Barisan Nasional (BN) dan Pemuda Umno Perlis juga menyatakan sokongan penuh kepada tindakan Dr Mahathir melucutkan jawatan Anwar daripada kerajaan dan parti.

Ketua Pemuda BN dan Umno negeri, Zahidi Zainul Abidin berkata, pergerakan itu berpendapat tindakan Perdana Menteri itu mengambil kira aspek ekonomi dan keselamatan negara.

(END)